

Fræðsluráð Hafnarfjarðar
Eyjólfur Sæmundsson, formaður

Sviðsstjóri fræðsluþjónustu Hafnarfjarðar
Magnús Baldursson

Hafnarfirði 14.12.2012

Efni: Umsögn skólaráðs Áslandsskóla vegna beiðni fræðsluráðs frá 11.12.2012

Háttvirtu viðtakendur

Skólayfirvöld Áslandsskóla og Foreldrafélag Áslandsskóla hafa á undanförunum árum lagt fram margar fyrirspurnir og sent bæjaryfirvöldum nokkur bréf er varða húsnæðis- og lóðamál Áslandsskóla. Í bréfum þessum höfum við lagt á borð bæjaryfirvalda skýringar og röksemdir fyrir því að nemendur í Áslandsskóla sitja ekki við sama borð og aðrir grunnskólanemendur í Hafnarfirði hvað varðar lengd skóladags og skólahúsnæði almennt.

Skólasamfélagið í Áslandi hefur einnig átt formlegar og óformlegar viðræður við bæjaryfirvöld, ráðamenn og starfsfólk sveitarfélagsins varðandi framtíðaruppbyggingu Áslandsskóla. Þær viðræður hafa ávallt snúist um mikilvægi þess að byggt verði viðbótarhúsnæði með fjórum kennslustofum auk íþróttasalar.

Það var okkur því mikið fagnaðarefni að lesa fundargerð fræðsluráðs frá 26.11.2012, sérstaklega tillögu númer 1. Þar segir: „Byggt verði íþróttahús með fjórum kennslustofum við Áslandsskóla og tekið í notkun haustið 2013. Rekstrarkostnaður er nettó allt að 14 m.kr. á næsta ári, en framkvæmdin yrði fjármögnuð af fasteignafélaginu og er verið að skoða það sérstaklega. Húsið yrði í eigu bæjarins frá upphafi. Fyrirvari er um að samningar náist við eigendur Áslandsskólalóðarinnar undir þetta nýja hús“.

Að sama skapi og við fögnuðum ofangreindu vinnuferli kom okkur í opna skjöldu tillaga fulltrúa Sjálfstæðisflokks frá fundi fræðsluráðs frá 10.12.2012. Þar segir m.a. í tillögu 2 undir 9. lið og yfirheitinu „Betri nýting skólahúsnæðis“: *Þar sem ekki liggur fyrir að hægt sé að ráðast í fjárfrekar framkvæmdir í bænum á næstu mánuðum vegna skuldastöðu sveitarfélagsins og ákvæða í lánasamningum við lánadrottna samþykkir bæjarstjórn Hafnarfjarðar að leita leiða til að leysa húsnæðisvanda við Áslands- og Hraunvallaskóla með öðrum hætti en viðbyggingum.*

Meirihluti fræðsluráðs, fulltrúar Samfylkingar og VG, bókuðu í kjölfarið: „Fullyrðingar í inngangi tillögu fulltrúa Sjálfstæðismanna um að ekki sé unnt að fjármagna eðlilega uppbyggingu skólmannvirkja í Hafnarfirði til að bæta aðstöðu og mæta fjölgun nemenda eru rangar.“

Skólasamfélagið er einróma sammála um mikilvægi þess að nemendur séu ekki sendir út úr hverfinu til að sækja íþóttir og annað skólastarf.

Ljóst er að þessi staða Áslandsskóla er ekki til skamms tíma heldur vandamál til lengri tíma og er það því krafa skólasamfélagsins að staðið sé við það skipulag og þau loforð sem gefin hafa verið um uppbyggingu hverfisins. Lengi hefur verið ljóst að eitthvað þyrfti að gera í húsnæðismálum Áslandsskóla.

Það að bera fyrir sig að ekki sé fjármagn til að stækka skólann getur ekki verið réttur skilningur fulltrúa í fræðsluráði. Bent skal á 68. gr. laga nr. 138/2002 þar sem eftirfarandi kemur fram: "Sveitarfélag má ekki veðsetja öðrum tekjur sínar. Ekki heldur fasteignir eða aðrar eignir sem það á og eru nauðsynlegar til að lögboðin verkefni sveitarfélags verði rækt, sbr. 67. gr. Aðrar eignir má veðsetja til tryggingar lánum sem sveitarfélag tekur til eigin þarfa og heildareignir sveitarfélags standa til tryggingar skuldbindingum þess." Með vísan til þessarar greinar má telja að hvert það ákvæði í lánaskilmálum sem takmarkar uppbyggingu á lögbundnum verkefnum sé ólöglegt og standi því ekki í vegi fyrir eðlilegum framkvæmdum. Leysa þarf úr framtíðarvanda Áslandsskóla strax. Langtímaúrræði, viðbótarbygging með fjórum kennslustofum og íþróttasal er þar eina vitræna lausnin að okkar mati. Vandinn er fyrir hendi í dag, vandinn hefur verið fyrir hendi undanfarin misseri og vandinn kemur bara til með aukast ef ekki verður hafist handa við þá framtíðarlausn sem viðbygging er.

Í dag er fyrirlestrarsalur heimastofa bekkjar í unglingsálf og þjónar því alls ekki þeim tilgangi sínum sem lagt var upp með. Kennslustofa við heilsdagsskóla er nýtt sem heimastofa bekkjar og nýtist því ekki starfsemi heilsdagsskólans að því marki sem lagt var af stað með, auk þess sem rými heilsdagsskólans minnkar að sama skapi. Náttúrufræðistofa er nýtt sem heimastofa bekkjar og er ekki hentug sem slík vegna ýmissa tækja og tóla sem þar eru. Lítið eldhús á efri hæð sem er ætlað til heimilisfræðikennslu er heimastofa bekkjar og nýtist því ekki í list- og verkgreinakenndu. Tónmenntastofa er heimastofa bekkjar og kennsla í tónmennt því á víð og dreif um húsið, m.a. í hátíðarsal sem er jafnframt mikið upptekinn vegna morgunstunda og ýmiss konar fræðsluheimsóknna. Eitt hópherbergja er notað sem skrifstofa námsráðgjafa.

Þess utan er kostnaður vegna skólaaksturs í íþróttir og sund um 15 milljónir árlega. Stundatafla nemenda Áslandsskóla hefur undanfarin ár alla jafna verið lengri fram á daginn vegna þessa. Slíkt truflar óneitanlega möguleika nemenda héðan á öðru tólmundastarfi og hefur áhrif á æfingátíma íþróttafélaga, tónlistarnám og fleiri tólmundir.


Huga þarf að velferð barna í Áslandsskóla og hagsmunum þeirra.

Skólasamfélagið í Áslandsskóla fer fram á að bæjaryfirvöld verði samtaka í að hefjast handa við byggingu viðbótarhúsnæðis með fjórum kennslustofum og íþróttasal við skólann sem tekið verði í notkun haustið 2013. Þannig og aðeins þannig verður leyst úr þeim húsnæðisvanda sem skólasamfélagið í Áslandi býr við.

Samþykkt í skólaráði Áslandsskóla 14.12.2012



Leifur S. Garðarsson
Skólastjóri Áslandsskóla



Unnur Elfa Guðmundsdóttir
Aðstoðarskólastjóri Áslandsskóla



Birgitta Rós Skarphéðinsdóttir
Nemendafulltrúi



Smári Snær Sævarsson
Nemendafulltrúi



Kristín Dóra Sigurjónsdóttir
Foreldrafulltrúi



Róbert Rúnarsson
Foreldrafulltrúi



Ása M. Hafsteinsdóttir
Kennarafulltrúi



Ólafur Þórarinnsson
Kennarafulltrúi



Halldóra S. Hafsteinsdóttir
Starfsmannafulltrúi



Axel Guðmundsson
Fulltrúi grenndarsamfélags